



Publicaziuns dalla vischnaunca, jamna 48

Votaziuns federalas e mintgamai ina votaziun cantunala e communal

L'urna principala en casa communal ei aviarta sco suonda:

sonda, 29-11-2014, 18.30–19.30
dumengia, 30-11-2014, 9.00–11.00

La documentaziun da votar duess mintga votant(a) haver obteniu. Cass cuntrari san ins s'annunziar immediatamein, denton **sil pli tard entochen venderdis, ils 28 da november 2014, allas 17.00**, tier l'administraziun communal (tel. 081 920 36 36).

Levgiament da votar

Mintga votant(a) ha la pussevividad da dar giu sia vusch a scret. En gliez mument sto el/ella observar il suadont:

1. Emplenir ora ils cedels da votar e metter quels en la cuviarta da votar e serrar giu ella.
2. Metter la cuviarta da votar ensemen cun il certificat dil dretg da votar **suttascret** en la cuviarta, cun la quala Vus haveis obteniu la documentaziun da votaziun.
3. La cuviarta ch'ei adressada all'administraziun communal saveis Vus tarmetter cun posta (**supplicau da francar**) ni directamein fierer en la scaffa da brevs dalla casa communal.

Ils cedels da votar ston esser sil pli tard la sonda, ils 29 da november 2014 allas 12.00 tier l'administraziun communal.

Il certificat dil dretg da votar ei da suttascriber. **Senza Vossa suttascripziun cun agen maun ei la votaziun nunvaleivla.**

Suprastonza communal Disentis/Mustér

Damondas da baghegiar

2014-1046.000

Datum dalla publicaziun: 28 da november 2014

Il patrun: Vischnaunca Disentis/Mustér, Via Cons 2, 7180 Disentis/Mustér

Il representant: Uffeci da baghegiar, Caum postal 57, 7180 Disentis/Mustér

Object: Object militar, midada d'intent en in object civil per diever sco magasin, parcella 320, Madernal – Acla, 7180 Disentis/Mustér

2014-1047.000

Datum dalla publicaziun: 28 da november 2014

Il patrun: Vischnaunca Disentis/Mustér, Via Cons 2, 7180 Disentis/Mustér

Il representant: Uffeci da baghegiar, Caum postal 57, 7180 Disentis/Mustér

Object: Object militar, midada d'intent en in object civil per diever sco magasin, parcella 340, Pardomat – Run, 7180 Disentis/Mustér

2014-1048.000

Datum dalla publicaziun: 28 da november 2014

Il patrun: Vischnaunca Disentis/Mustér, Via Cons 2, 7180 Disentis/Mustér

Il representant: Uffeci da baghegiar, Caum postal 57, 7180 Disentis/Mustér

Object: Object militar, midada d'intent en in object civil per diever sco magasin, parcella 2929, Madernal – Acla, 7180 Disentis/Mustér



- Ils plans da construcziun ein deponi tier l'administraziun communal.
- L'investa publica cuoza 20 dis dapi il datum dalla publicaziun.
- Eventualas protestas encunter sura damonda da baghegiar ein d'inoltrar a scret enteifer 20 dis all'istanza da baghegiar, caum postal 57, 7180 Disentis/Mustér. La protesta sto esser motivada e suttascretta dil recurrent ni da siu representant.

Disentis/Mustér, ils 24 da november 2014
Uffeci da baghegiar Disentis/Mustér

Lubientscha da baghegiar

L'istanza da baghegiar ha concediu suandonta lubientscha da baghegiar:

Nr. 2014-1043.000

Claustra da Mustér, Via Claustra 1, 7180 Disentis/Mustér; construcziun d'ina lingia pil provediment da scaldament dils baghetgs 196D e 196B, parcella 2883, Via Lucmagn 31, 7180 Disentis/Mustér

Disentis/Mustér, ils 24 da november 2014
Uffeci da baghegiar Disentis/Mustér

Cussegl da vischnaunca

Preventiv 2015 e program d'actividad 2013–2016

En sias sedutas dils 20 e 21 da november 2014 ha il cussegl da vischnaunca sut il tgamun da Flavio Murer tractau il program d'actividad 2013–2016 ed il preventiv 2015.

Suenter ina cuorta discussiun ha il cussegl da vischnaunca returnau il preventiv 2015 alla suprastonza communal cun l'incarica da migliorar persistentamein la situaziun finanziaria dalla vischnaunca. La finamira duei esser da contonscher in pli ault cash-flow dad 1 milliun francs enstagl da frs. 462 000.–. Cheutras s'augmenta il grad da finanziaziun dallas investiziuns previdas.

La suprastonza communal vegn a presentar al cussegl da vischnaunca propostas per saver tractar definitivamein l'entschatta digl onn vegnent il preventiv 2015 sco era il plan da finanzas 2016–2020. In augment dil cashflow vegn mo ad esser pusseivels cun ina reducziun substanziala da cuosts, dapli entradas cunzun tier las finanziaziuns specialas e cun ina reducziun da prestaziuns.

Il cussegl da vischnaunca ha plinavon priu enconuschientscha dil program d'actividad 2013–2016 e fixau pigl onn 2015 il pei da taglia sin entradas e facultad sin 120% e la taglia sin schischom sin 1,7%o (sco tochen dacheu).

Suprastonza communal

Pigniel da Nadal 2014

Il Menaschi tecnic dalla vischnaunca da Mustér organisescha uonn la vendita da pigneuls da Nadal. Ei vegn vendiu pignola mo sin empustaziun. Il pigniel sa vegnir retratgs ils 19 da december 2014 naven dallas 13.00– 17.30 avon il luvratori dil Menaschi tecnic a Cuoz. Sin giavisch e per in prezzi surpli da frs. 5.– vegn il pigniel era furnius avon casa.



Il pigniel sa vegnir empustaus cul talun aschuntau entochen ils 10 da december 2014:

Adressa: Uffeci forestal, Caum postal 57, 7180 Disentis/Mustér, telefon 081 920 36 36, Mail: uaul@disentis.ch

Bien engraziament

Pégn (Rottanne)

1,10 – 1,50 m Fr. 26.–

1,60 – 2,00 m Fr. 29.–

2,10 – 2,50 m Fr. 33.–

Viez (Weisstanne)

1,20 – 1,70 m Fr. 38.–

1,80 – 2,50 m Fr. 43.–

Pégn da Nordmann

1,10 – 1,50 m Fr. 41.–

1,60 – 2,00 m Fr. 56.–

2,10 – 2,50 m Fr. 78.–

Pinar sez il pigniel da Nadal!

Igl uffeci forestal dat era uonn la pusseivladad a mintga habitont ni hosp da Mustér dad ir egl uaul a pinar gratuitamein il pigniel da Nadal giavischau. Il selvicultur communal accumpogna ils interessai e dat in ni l'auter cussegl.

Nus s'entupein cun resti cauld, buns calzers ed in resgiut, **sonda, ils 20 da december 2014**, allas 9.00 sil parcadi Claustra (Davos-Mustér).

Uffeci forestal Disentis/Mustér

Tagliar caglias e plontas

Tenor art. 75, al. 4 dalla lescha da baghegiar astgan plontas buca disturbar la vischinonza ni la segirtad publica. Per liung dallas vias publicas e privatas sco era sendas ein tuttas caglias e plontas da tagliar anavos, aschia che nuot survarga il cunfin (era buca suenter ch'ei ha neviu). Quellas lavurs ston esser finidas sil pli tard entochen la fin da november 2014. En cass che las caglias e plontas vegnan buca tagliadas anavos enteifer il termin fixau, vegnan quellas lavurs exequidas entras il survetsch tecnic dalla vischnaunca cun adossar ils cuosts als proprietaris.

Uffeci da baghegiar Disentis/Mustér

Sendas territori Marietta e via Run

Muort lavurs da rumida dalla lenna derschida e transports da lenna cun helicopter egl uaul dalla Claustra–Marietta–Fuortga, vegn la via dil Run e las sendas el contuorn serradas naven diils 24 da november entochen ils

5 da december 2014. Quei vala mintgamai ils luverdis dallas 7.30–18.30 per pedunzs sco era per tut traffic motorisau.

Nus supplichein da prender enconuschientscha da quest avis. Bien engraziament per la capientscha.

Uffeci forestal Disentis/Mustér



Scola Mustér: Elecziun Sabrina Sgier

Gliendisdis, ils 24 da november 2014 ha il cussegl da scola eligiu Sabrina Sgier da Mustér sco nova scolasta per la scola primara. Ella ei carschida si ella Val Lumnezia ed a Mustér e terminescha la proxima stad la scolaziun scolaziun sco scolasta primara alla scola aulta da pedagogia a Cuera. Sabrina Sgier vegn a surprender la responsablada sco scolasta da classa dalla 2. classa primara.

Kai Hinrichsen, meinascola

Sontgaclau Funs – Latis – Clavaniev, ils 6 da december 2014

Sco usitau s'entaupan ils vischins e las vischinas da Funs, Latis e Clavaniev suenter messa da Sontgaclau allas 17.00 el curtin dalla Villa per beneventar il Sontgaclau. Purschiu vegn vin cauld, punsch e suppa da giutta. Plinavon dat ei era uonn in program special pils affons. Per dapli informaziuns: Aurelia Flepp, tel. 076 533 83 60. Bugen fa il Sontgaclau era ina viseta tier Vus a casa.

Sontgaclau Clavaniev:
Fadri Huonder, fadri.huonder@me.com

Sontgaclau Funs e Latis:
Adrian Huonder, adrian93@gmx.ch

Nus selegrein d'astgar beneventar vus en il curtin dalla Villa.

Sontgaclau da Segnas/Acletta

Sontgaclau viseta ils 6 da december 2014 las famiglias da Segnas e d'Acletta. Per che Sontgaclau stoppi buca star avon escha serrada e spitgar vegn supplicau da s'annunziar sche Sontgaclau astga era vegnir a visitar Vus. Ils organisaturs ein zun engrazieivels sche Vus tarmetteis gia ordavon enqual cavazzin sur dils presents, en special sur dils affons.

Igl oremus vegn prelegius la sera da Sontgaclau allas 21.00 ella baselgia ad Acletta ed allas 23.00 ell'ustria «Cresta» a Segnas. Ei fagess grond plascher d'astgar benevetar ina gronda raspada convischinas e convischins.

Las annunzias ed ils cavazzins saveis bugen tarmetter **entochen ils 5 da december 2014** sin la suondonta adressa:

Rafael Maissen, Via Acletta 22, 7180 Disentis/Mustér

Ni per mail sin: rafaelmaissen@bluewin.ch

Cordial engraziament
Uniun da giuventetgna Segnas-Acletta



Konstruktiver Umgang mit Stress und Stressoren

Mittwoch, 3. Dezember 2014, 20.15 Uhr im Center sursilvan d'agricultura Disentis/Mustér

Vortrag zum Sema «Burn-out» mit Marcel Bäni

Stress ist ein natürlicher und wesentlicher Bestandteil unseres Lebens, der uns Impulse für unsere Aktivitäten gibt. Stress ist jedoch auch die Ursache vieler soziologischer, wirtschaftlicher und medizinischer Probleme.

Das Referat vermittelt Grundwissen über Stress, Stresssymptome überlastungsbedingte Depressionen und Burn-out, aber auch Hinweise zum Erkennen des eigenen Stressprofils und Anregungen zum Stressmanagement im persönlichen Alltag.

Quest'occorrenza vegn sustenida da l'Uniun purila Sumvitg.

Entrada libra, collecta.

Cordial beivegni!

Tut nossas occurenzas ein publicas. www.agricultura.ch

Scoletta Mustér/fiera da Nadal

A caschun dalla fieria da Nadal dalla dumengia vargada a Mustér han las scolettas vendiu lur products fatgs a maun. Ils scolarets da scoletta selegrein d'astgar surdar il recav da fr. 2321.60 alla casa d'affons Urpi Wasi a Peru.

Nus engraziein a vus cordialmein per il grond sustegn.

Affons da scoletta cun lur mussadras

Rimanda da launa

29-11-2014, 9–11, Mustér, parcadi Pendicularas

29-11-2014, 13.00 Uhr Glion, Werkhof

www.swisswool.ch

Corporaziun megliuraziun squadra Segnas

Invit alla radunonza generala 2014.

Gliendisdis, ils 8 da december 2014 allas 20.15 en casa da scola Segnas

Tractandas:

1. Beinvegni
2. Elecziuns d'in dumbravuschs
3. Prelecziun ed approvaziun dil protocol 2013
4. Render quen e rapport dils revisurs
5. Orientaziun
6. Taxas annualas
7. Elecziuns: a) president
b) actuar
c) cassier
d) dus revisurs da quen
8. Program da lavur
9. Varia

A stedia partizipaziun envida
la suprastonza



Vischinadi Mompé-Medel

Radunonza generala, mesjamna ils 10-12-2014 allas 20.15 en La Sgursalada a Mompé-Medel.

Suenter la radunonza vegn offeriu in puschegn.

Cordialmein envida
la suprastonza

Uniun samaritana Mustér

Gliendisdis, ils 8 da december sentupein nus allas 19.00 avon halla Cons. Nus serendin a pei entochen Disla nua ch'ei vegn offeriu a tuts participonts ina buna tscheina ell'Ustria Fravia.

A casa returnein nus cun il bus.

Selegrond sin vossa participaziun ed ina biala sera en buna cumpignia salida
la presidenta

Uniun da dunnas Mustér Sontgaclau viseta ils seniors

Dumengia, ils 7 da december 2014 allas 13.30 en halla Cons.

Cun grond plascher envidein nus tut ils convischins e las convischinas da 60 onns ensi alla tradiziunala sentupada cun Sontgaclau. Cun in pign program, viseta dil Sontgaclau ed in puschegn lein nus porscher a Vus in per emperneivlas uras en cumpignia.

Nus selegrein da passentar ensemen cun Vus in bi suentermiezdi.

Cordialmein envida
Uniun da dunnas Mustér

Sontgaclau 2014

Sonda, ils 6 da december 2014 viseta il Sontgaclau Vitg las famiglias dalla fracziun Vitg.

- 13.30 viseta ellas ustrias dil vitg
- 15.30 messa da Sontgaclau, baselgia parochiala s.Gions
- 16.30 sentupada cun Sontgaclau avon l'ustria La Furca

Silsuenter viseta dil Sontgaclau da vitg ellas casadas. Il Sontgaclau viseta era uonn bugen vus a casa.

Vossa annunzia per mail sontgaclauvitg@hotmail.com ni per posta Sontgaclau Vitg 2014, Posta, 7180 Mustér fagess a nus grond plascher.

Cordials salids
Uniun da giuventetgna Mustér/Fracziun Vitg



**Uniun da dunnas Mustér
Mummas cun affons pigns
Seruschnar – paterlar – termagliar**

Tut ils affons da 0 entochen 3 onns cun lur mummas e fargliuns ein cordialmein beinvegni **mesjamna ils 28 da november 2014, dallas 15.00–16.30** per passentar in bi suentermiezdi da cumpignia el local Artgin.

Per damondas ni sclariment stat Nathalie Lutz, Tel. 081 947 61 94 bugen a disposiziun.

Mummas cun affons pigns Mustér